

Ndaem Hoenzfeiz

种炊烟



Daxmeh naeuz: “Hoenzfeiz dwg sing duz roeg youq gwnz go faexyz bakdou ranz daxbuz heuh haenx.” Daxboh naeuz: “Hoenzfeiz dwg dujva hai dingj ranz daxbuz haenx.” Gou naeuz: “Hoenzfeiz dwg gaeq haen, ma raeuq caeuq sing riu gyoengq doengz-doih.”

Vahsug naeuz: “Ndaem gva ndaej gva, ndaem duh ndaej duh”, yienghneix ndaem hoenzfeiz ndaej mbouj ndaej hoenzfeiz ne? Gou caen siengj ndaem cungj hoenzfeiz ndeu, aenvih hoenzfeiz guhcingq sam daih vunz ranz gou majhung. Daxgoeng dwg youq maqmuengh hoenzfeiz lajde majhung, daxboh dwg youq hoenzfeiz heux lajde majhung, gou dwg youq

hoenzfeiz cimyawj lajde majhung. Geiq ndaej geij bi gonq, moix bi ndwencieng dou cungj ma ranz daxbuz gvaqcieng. Ranz daxbuz youq aen mbanj bien’gyae ndeu, dwg ranz-bingzfuengz, baez daengz seizdoeng couh gig nit, cij ndaej baengh coemh feiz daeuj byoqfeiz. Ndaw cauq coemh feiz le, congheuh couh hwnj hoenzfeiz baenz geu baenz geu, youq gyae’gyae couh yawj ndaej raen. Mwh cawj haeux, engq dwg hoenzfeiz mbinneuneu. Gou gyaez yawj hoenzfeiz, de mbaeumbeng youh miz rengz, menhmenh mbin bae gizgyae.

Hoenzfeiz gyanghaet daegbied ndeiyawj, buenx dwk gaeq haen, ma raeuq menhmenh mbin hwnj gwnz-

mbwn bae, lumj gaiqmae yiuhrumz nei, seiz raen seiz mbouj raen, cix baenzlawz cungj mbouj gat. Langh miz rumz ci gvaq, hoenzfeiz couh diuqbeiz ndonj hwnj gwnzmbwn o’ngaungau bae, caeuq fwjhou guhcaemz diuqfoux. Hoenzfeiz banngaiz dwg ceiq cwxcaih, mbouj vaiq mbouj menh. Saek de damhdamh, lamzlamz, youq dingj ranz, geh faex ndaw mbanj sanq ok, lumj aen loq longz baengzsa mbangmbit nei. Hoenzfeiz vaiqhaemh dwg aen cung cinjseiz ndeu, daengz seizgan couh mbin hwnj gyangmbwn bae, heuh lwgnyez guhcaemz baeg le ma ranz gwn caeuz. Danghnaeuz seizde doek fwnmoenq, fwnmoenq couh sawj hoenzfeiz bienq ndaej engq

unq lo, ndwn youq ndaw mbanj deng hoenzfeiz humx haenx, couh lumj youq ndaw diegsien nei. Mwhde, daengx aen mbanj youq laj hoenzfeiz mbinneuneu, yienhndaej yienghde hozswnh caemdingh.

Hoeng riengz dwk gwndaenj ngoenz beij ngoenz ndei, aen mbanj ranz daxbuz ciemhciemh mbouj miz vunz yungh cauq seizgaeuq, hoenzfeiz cingq baez di baez di siasaet, saedceij caemdingh hix baez di baez di siasaet lo.

Gou siengj ndaem ok hoenzfeiz mbinneuneu, yienzhaeuh soengq hawj haujlai haujlai vunz. Soengq hawj daxbuz geu ndeu gonq, hoenzfeiz mbinneuneu, vih de vix diuzloh ma ranz; caiq soengq geu ndeu hawj Cangh daxheiz ranznden, hoenzfeiz mbaeumbeng ingj ok ndangngaeuz gaenxyaek de; lij soengq hawj Lij daxgoeng mbanjnden, hawj boux canghsei neix daezhawj di loh-naemj…… Gou lij soengq hawj haujlai haujlai vunz, hawj daihgya caiqbazez yawjraen hoenzfeiz swng hwnj-daeuj.

Dangyienz, gou ceiq siengj ndaem cungj hoenzfeiz ndeu soengq hawj lajmbanj, dawz gij caemdingh haeuj gyoengqde haenx boiz hawj gyoengqde……

(*Neimungzguj Swcigih Ciz-fungh Si Linzsih Yen Daihngieih Siujyoz roek nienzgaep Vei Laiz*)

Baez Fatyienh Geizmiuq Ndeu

一次奇妙的发现

Ranz gou ciengx duz meuz hau ndeu, de daengx ndang hausag, yungzyubyub, mwh de gutgungq, couh lumj aen giuznae ndeu, dwggvaez dangqmaz. Gou ging-ciengz caeuq de guhcaemz, ndigah dou couh baenz baengzyoux ndei lo.

Ngoenz ndeu banngaiz, mwh gou yietnaiq, gou baez nyex gyaeuj, duzmeuz sawqmwh ndwn youq henz gou, hawj gou doeksaet yat! Gou couh geizheih lo, haxbaenh de mingzmingz lij youq giz gyae, baenzlawz fwt couh buet daengz

baihnaej gou lone? Neix couh yinxhwnj gou geizheih lo, gietdingh bae damqcaz mbat ndeu!

Gou yaengyaeng umj hwnj duz meuz, siujsim biengj gaiq nyauj de, yi! Ndaw nyauj miz haujlai noh din youh na youh unq, rib raeh de ndaej seizbienth iet rwt, vanzlij mwh byaij loh rib de mbouj bungq dieg.

Gvaq geij ngoenz gou fouzeiq yawjraen duzmeuz youq ndawhongh gaeb roeglaej, de ndang gungj da daengx, fwt yat mbat ndeu couh gaeb dawz roeglaej! Gou nyaenx mbouj ndaej bekwngz hwnjdaej, ak lai lo, yawjdaej de byaij loh caen mbouj miz sing!

Yienghneix, gou couh bae ndaw sawghobuj ra dapanq. Hwhw, caen ngamj, ndaw saw miz bien faenzcieng daezmoeg dwg 《MeuzVihmaz Byaij Loh Mbouj Miz Sing》dahraix, ndaw saw sij naeuz: “Aenvih nohdemh gwnz din duz meuz mboujdanh ndaej sawj duz meuz daj giz sang yat coh baihlaj miz cozyung gemjmbaeu de daemj dieg daiq rengz, lij ndaej sawj de mwh byaij loh mbouj ok sing. Yienghneix ndaej engq ndei depgyawj duzde yaeq gaeb haenx, mbouj hawj duzde fatyienh.” Laxlawz dwg gij goenglauz nohdemh ha!

Duz meuz caen coengmingz, gou dauqdae rox duz meuz vihmaz byaij loh mbouj miz sing lo!

(*seiq nienzgaep Cangh Swjhanz*)



Makloengzfeiz

火龙果

Gou gyaez makbingzgoj nding’yanyan, makgaivaiz henjrwgrwg, hoeng mak gou ceiq gyaez haenx dwg makloengzfeiz.

Makloengzfeiz maj ndaej gig daegbied. Aende daengx ndang nding’yanyan, baihrog maj rim mbaw heu lumj gaiqlinx nei, gyae’gyae yawj bae, lumj bog feiz dawzyubyub nei, haeuj gyawj yawj, youh lumj aen valup yaeq hai nei.

Noh makloengzfeiz miz saekhau caeuq saekgyaemq song cungj. Gou maij gwn saekgyaemq.

Aeu cax daeuj buq makloengzfeiz baenz song mbiengj, noh mak couh sikhaek loh okdaeuj, feih hong cingdamh hix coemj haeuj ndaeng daeuj. Mwnz yawj, gwnz noh mak lij miz ceh ndaem iq lumj lwgraz nei deihaenyaen. Ngah lai lo, gou ganjgip aeu geng daeuj vat gwn. Va! Noh mak vansubsub, ceh ndaem byoiqbedbed, caen hawj vunz gwn le lij siengj gwn!

Makloengzfeiz yingzyangj gig lai, ndaej gemj biz, nyinh saej, youh ndaej bouj diet, ceh makloengzfeiz lij ndaej coi dungxsaej siuswg ne.

Makloengzfeiz dwg mak gou ceiq maij haenx.

(*Gyanghsuh Swngj Nanzgingh Si Nanzswh Fucungh Sinhcnwngz Siujyoz seiq nienzgaep Liuz Denhloz*)

